

M E D E N D I

METHODUS DERIVANS.

DISSERTATIO INAUGURALIS, QUAM ANNUENTE
INCLYTA FACULTATE MEDICA IN ALMA AC
CELEBERRIMA R. SC. UNIVERSITATE HUNGARICA
AD GRADUM DOCTORIS MEDICINAE RITE OBTI-
NENDUM PUBLICÆ DISQUISITIONI SUBMITTIT

VINCENTIUS ZOMBORCSEVICS

HUNGARUS M. THERESIOPOLITANUS.

*Theses adnexae publice defendantur in Palatio
Universitatis majore die 24. Aprilis 1832.*

PESTINI,

TYPIS TRATTNER-KÁROLYIANIS.

Parvi proponemus et ampli!



SPECTABILI CLARISSIMO

AC

DOCTISSIMO DOMINO DOMINO

J O S E P H O R U D I C S
DE ALMÁS

EQUITI AURATO, AA. LL. ET PHILOSOPHIAE, NEC
NON JURIS UTRIUSQUE DOCTORI, IN REGIA SCIEN-
TIARUM UNIVERSITATE HUNGARICA FACULTATUM
PHILOSOPHICAE, ET JURIDICAE COMMEMBRO,
INCLYTORUM COMITATUM BÁCS, ET BODROGH
ARTICULARITER UNITORUM, NEC NON TOLNENSIS,
CSONGRÁDENSIS, ET VERÓCZENSIS TABULAE JUDÍ-
CIARIAB E PRIMARIIS ASSESSORIB.

V I R O
ERUDITIONE BENEVOLENTIA NOBILITATE
C L A R O
LITERARUM ET BONARUM ARTIUM
FAUTORI EXIMIO
MOECENATI MUNIFICENTISSIMO
IN PIGNUS PROFUNDISSIMAE VENERATIONIS
GRATIQUE ANIMI
TENUES IIAS PAGELLAS

D. D. D.

AETOR.

1 21 KJ

P r o o c m i o n.

**fixum in animo est propositum, penitus ab-
jiciam, ut potius illud differam solum, us-
quedum Galenus media necessaria tulerit.
Ad haec, si debite respexeris Lector Bene-
vole, judicium de opere mitius feres, illud
autem de Auctore ipso suspendes, Dabam
Pestini Mense Aprilis 1832.**



Definitio.

1.

Derivatio pathologica est mitigatio, aut sublatio status morbos per affectionem in parte organismi alia provocatam.

Omnis autem Derivationis sive *naturalis*, quam sola naturae autocratia, sive *artificialis*, quam haec opera medici incitata perficit idea in *Sympathia* s. *Commercio vitali* radicatur, quo omnia quidem organa, qua partes unius ejusdemque totius in unum nectuntur, quod tamen inter nonnullas organismi partes strictum et multiplex, inter alias minus exquisitum, et simplicius est. Misso autem nexu partium organico, et phoenomenis, quae in contigitate et vicinitate partium radicata primum habent explicatum; de solo loquar *nexus vitali*; qui, cum dupplici sub forma manifestus fiat: qua *Consensus* nimirum, et *oppositio vitalis*, seu *Antagonismus*; — Derivatio quoque duplex distinguenda erit: *Consensualis* nempe et *oppositionalis*, seu *Antagonistica*. —

Consensus.

2.

Nomine *Consensus*, *Philadelphiae* venit nexus organorum ille, quo fit, ut irritatio unius similem alterius provocet, hacque ratione homogena utriusque suscitetur reactio. — Nexus iste consensualis omnia corporis humani organa, et singulas singulorum organorum particulas intercedens in causa est, ut topica organi cuiuspam affectione suscitata, haec in loco primae originis porro quoque persistans protinus latius proserpat, et alias, saepe quam plurimas (quandoque omnes?) organismi partes in aversum trahat, morbusque strictissime topicus primo solum originis suae momento dici possit. — Morbo vero hac ratione intentione et extensione aucto vita quoque universa incitatur, atque energia majori in morbum reagens luctam ponit vividissimam, qua morbi judicium promptum et oitum sive in salutem, sive in perniciem aegri provocatur; id quod in morbis febrilibus quotidie fieri videmus.

Idea Derivationis consensualis.

3.

Alias consensuali in alio organo irritatione, hujusque reactione homogena suscitata et susten-

tata morbus in organo protopathico multum mitigatur, vel etiam protinus cessat. Fit hoc, quatenus factoribus vitalibus alium in locum derivatis, processuque morboso eodem alibi excitato et sustentato morbo primario pabulum quodammodo subtrahitur, qui etiam ideo imminui, vel penitus extingui debet. — Hoc ergo in casu transit consensus in antagonismum (§. 7. n. 2.) nec differt *effectualiter* derivatio consensualis ab antagonistica; quin tamen ideo superfluam distinctionem hanc censem, ut potius eam in natura rei fundatam existimem, cum *causaliter* utraque diversa omnino sit. (§. 5.)

Media nexus consensualis.

4.

Partes unius ejusdemque systematis organici, nec non singulae organi cuiuspiam particulae consensum intimum et luculentissimum; ast diversa quoque organa, saepe et diversissima et remotissima tam in statu sano, quam etiam morboso manifestum inter se *nexus consensualis* fovent. Cujus nexus media praecipua sunt:

a) *Nervi*. Uberrimum commercii consensualis fontem nervi constituunt, quibus diversissimae saepe et remotissimae corporis partes amico quodam foedere junguntur. — Communis enim plurium nervorum (omnium?) origo; multiplex

sub decursu eorum unius cum altero ansa , plexu ganglio unio cultro anatomico non semper demonstranda; et vitalitas altissima in causa est, ut adfectionis unius organi facillime et citissime et aliud particeps reddatur.

b) *Vasa.* Systema enim vasorum sanquiferorum continuum nusquam interruptum efficit, et diversi generis vasa anastomosibus frequenter uniuntur.

c) *Textus cellulosis.* Systema vitalitatis quidem inferioris, ast latissime per corpus diffusum,

d) *Membranarum Continuitas.*

e) *Structurae et Functionis in diversis organis similitudo.*

Quo plura mediorum horum concurrunt , et quo altioris illa sunt dignitatis, eo exquisitor organi unius cum aliis erit consensus. Sic organa nervis , vasisque copiosis instructa vividissimum cum plurimis aliis commercium consensuale fovent; alia e contra , quibus nervi pauci et vasa perexigua sunt jure solum vicinitatis, et continuitatis consensum aliquem fovebunt. — Viget insuper inter partes nonnullas , in statu praeparatis morbo, peculiaris consensus , quin ejus fons penitus perspectus huicdum sit. Sic inter Parotidem , et organa Genitalia. —

Antagonismus.

5.

Nomine *Antagonismi*, *oppositionis vitalis* venit nexus vitalis organorum ille, quo fit, ut affectione unius provocetur opposita alterius scopo eo, ut sublatum in organismo virium aequilibrium restituatur.

Turbatur autem aequilibrium virium s. harmonia: a) *Excessu* factorum vitalium in sisteme, aut provincia quadam systematis cuiusdam organici, aut organo quopiam. — b) *Defectu* aut *suppressione* eorumdem factorum. — Causae haec, utut e diametro sibi oppositae eundem tamen inducunt effectum. Lex enim Antagonismi suprema est: *Suppressa activitate organi unius exaltatur ea alterius*, et vicissim: *Exaltata vita hujus deprimitur ea alterius*. Antagonismo ergo vitali organon unum saepe vices agit alterius, seu: organa se mutuo supplent — Consensu autem se mutuo adjuvant. Antagonismo nisus aequilibrium restituendi — Consensu nisus illud sustentandi manifestatur.

Organa antagonistice juncta.

6.

Viget Antagonismus inter diversissimas corporis humani partes; qui tamen jam manifestior,

jam magis obscurus, saepe etiam plenarie sensibus nostris subtrahitur. Probe autem distinquentur antagonismus *Physiologicus* a *Pathologico*. — Ille, vitae omnis fundamentum, lassime diffusus inter omnes corporis partes viget. Sic est oppositio inter partem systematis nervosi centralem, et periphericam — inter finem nervorum centralem et periphericum — inter nervos sensus et motus etc. etc. — Antagonismus pathologicus minus late diffusus, saltem non ubique manifestus — eminet:

a) Inter vitam *psychicam* et *somaticam*. Antagonismus hicce patologicus in multis morbis manifestatur, quo sit, ut depressa abnormiter vita inferiore altior morbosam acquirat aciem, et vicissim. Hoc de illis solum morbis valere, qui organa vitae alterius per excellentiam adgrediendo, reliqua intacta magis relinquunt, suapte patet.

b) Inter *Systema nerrosum animale* (cerebrale) et *vegetativum* (ganglionum). Sic lanquent functiones mentales vigentibus functionibus vegetativis; et vicissim.

c) Inter *Systema cutaneum externum* et *internum*. Aestate per excellentiam vivit cutis, hyeme tubus alimentaris.

d) Inter *Systema cutaneum externum*, et illud *Membranarum serosarum, fibrosarum* et *Sero-fibrosarum*. Rheumatismus, Hydrops sup-

pressa cutis per refrigerium admissum functione;
— sanatio malorum illorum hac restituta.

e) Inter *Systema cutaneum externum*, et *Pulmones, Hepar, Renes*. Cutis enim externa non fluidum solum serosum se et excernit, quo opere cutis cohilito activitas renum vicarie intenditur — sed gravissimum insuper cutis munus in eliminatione phlogisticorum consistit, qua intercepta gravissimas pulmonum hepatisque turbas oriri quotidie videmus; — nexus hoc antagonistico pro dignitate non semper a Medicis aestimato.

f) Inter *Pulmones, Hepar*, et *Renes*. Vita pulmonum aestivo tempore depressa ea hepatis multum intenditur. Incrementum unius a morbis alterius. Urina ictericorum. etc.

Idea derivationis antagonisticae.

7.

1. Stimulus quicunque parti cuiquam organicae adplicitus, atque in eadem consensus ope dissipatus — *hujus irritationem consensualem*, atque vitalitatis exaltationem — *alterius* antagonisticam depressionem inducit. — Sic Emeticum refracta dosi applicatum stimulo suo consensus ope per universum *Systema gangliosum* dissipato vitalitatem *hujus omnem multum intendit* — *eam autem Systematis cerebralis deprimit*.

2. Stimulus magis fixus, et circumscriptus in eodem etiam organo diversum exerit effectum: exaltationem nimirum vitalitatis in loco adlicationis, et depressionem ejus in partibus aliis organi ejusdem. Sic ulcus faciei setaceo, aut fonticulo ad aliam cutis plagam minus nobilem saepe feliciter derivatur —

Leges derivationis.

8.

1. Derivatio fiat ad partem ab organo, aut loco protopathico satis remotam. — Nihil peius, quam remedia quaecunque scopo derivante organo adfecto vicina applicare. Stimulus enim ad viciinas et contiguas partes protensus has semper irritabit, quo in casu exasperatio potius morbi, quam ejus mitigatio provocabitur. Sic in ophtalmia derivantibus indicatis unquentum Autenriethi non applicamus regioni supraorbitali aut temporali —; quin ideo remotissimas semper et oppositas partes e. g. plantas pedum in adfectionibus cerebri exquirere necessum aut peculiariiter indicatum sit.

2. Derivatio fiat ab organo nobiliore ad ignobilium. — Sic ab oculo ad cutim. Sic a nobiliore cutis parte ad ignobiliorum — a facie ad nucham dorsum etc.

3. Morbus derivatione provocatus periculi vel expers, vel minoris, saltem nunquam majoris sit. Et

4. Sit sanatu facilior.

Locus Derivationis.

9.

Organon, quod remediis derivantibus potissimum plectitur, Systema cutaneum est. — Multiplicem enim cum diversissimis corporis humani organis nexum fovet, et ad applicationi remediorum quorumvis optime patet. Natura ipsa Crisibus et Metastasibus morbum ad cutim saepissime derivat, et funestae plerumque derivationes ad alia organa sunt. Adficitur autem scopo morbum derivandi Systema cutaneum tam internum, quam externum ita tamen, ut sub derivatione ad tubum alimentarem mitiora solum; — sub ea autem ad cutim externam fortiora quoque, et fortissima in usum trahantur. — Derivationem ad tubum alimentarem *Emeticis* et *Purgantibus*; eam vero ad Cutim externam *Repellentibus cutaneis* potissimum absolvimus.

Emetica.

10.

Emetica remedia scopo dirivante refracta potissimum dosi — *ad nauseam* — porriguntur.

Plena enim dosi exhibita ob violentam et tumultuariam ventriculi convulsionem, insignemque universi corporis concussionem graves concitantur universi Systematis sanguiferi turbae, sanguinisque torrente quaqua versum propulso, notabilis universi corporis exstimulatio, et exagatio provocatur. — Omnis autem derivatio per emetica in nexus vitali radicatur, qui eminentissimus inter ventriculum, et pleraque alia organismi organa viget; quo sit, ut stimulus quicunque ventriculo adPLICatus citissime, et tutissime et ad alia organa sive consensuali sive antagonistico modo propagetur. — Ut vero derivatio haec melius pateat, actionem emeticorum et topicam et consensualem paucis attingere necessarium visum fuit, qua ratione in expienda actione derivantium aliorum quoque progrediemur.

11.

Dum Emetica in ventriculum delata cum hoc in contactum immediatum deveniunt, quin resorbeantur, stimulum periphericis nervorum sinibus addunt per eminentiam dynamicum gradus diversi pro diversa emetici potentia, et ventriculi receptivitate modo majori, modo minori. Stimulus hicce nervis impressus ad fibras quoque musculares, et universam ventriculi compagem

mox protenditur; oriturque penes reactionem nervosam ingratis sensus communis adfectionibus manifestam — motus ventriculi vehementior, et secretio humorum adacta, quibus omnibus ventriculus stimulo inimico se subtrahere conatur: ita, ut vomitu vel ob tenorem virium infractum, vel ob mechanicum aliquod obstaculum interdicto paralysis nervi vagi, ipsaque mors inducta visa fuerit.

12.

Stimulus hic ventriculo impressus per universum Systema ganglionum protinus extenditur. — Plexus solaris majorem nunc reactionem molliens praecedentem extimulationem manifeste loquitur — sanguinis et lymphae in vasis abdominalibus circulus impellitur; qua de causa, et aucta simul secretione tubi alimentaris resorbtio intenditur, stasesque abdominales discutiuntur. — Stimulo simul consensualiter ad pulmones, quorum stases solvuntur, spasmi delentur etc. et cutim externam protenso activitas hujus omnis intenditur, id quod larga Ephidrosis, saepe nullis aliis remediis provocanda, abunde testatur. — Celebres hoc scopo, Systema nempe ganglionum excitandi, stasesque dissolvendi, pri
Juliae Schmuckeri sunt:

Rp. Galbani
 Ammoniaci
 Saponis med.

ana dr. unam

Rad. Rhaei

dr. semis

Tart. stib.

gr. quindecim

m. f. pil. pond. *gr. duorum* consp.

D. S. Mane et Vespere pil. 10—15.

13.

Exstumulato ita universo systemate ganglionum, organisque vitae vegetativae, antagonistica provocatur systematis cerebralis depressio. — Morbi cerebrales in exorbitante systematis hujus activitate, aut suppressione ejusdem positi derivatione ita ad sistema gangliorum facta optime, saepe unice solum compescuntur. — Laudata est methodus haec in Febri Nervosa e suppressa vita Encephali, qualis potissimum est, orta; sub initio morbi maxime certe indicata. — Cel. Ph. C. Hartmann meus condam in Medicina Practica Magister venerandae memoriae curam Febris Nervosae ab Infuso Ipecacuanhae dosi refracta potissimum ordiebatur; quam methodum felicissimo effectu coronatam sat saepe admirati sumus.

Cathartica.

14.

Remedia Cathartica essentia ab Emeticis nequaquam diversa — effectu solum ab iis differunt; quod nimirum specificam ut ita dicam ad inferiorem tubi alimentaris portionem relationem soveant, quae remediorum horum qualitas principem eorum ad reserandam alvum usum ponit. In omni autem effectu purgantium, sive per os sive per anum — *clysmata* — ingerantur, rite aestimando tum ad receptivitatem ipsius organi, tum etiam, et quam maxime, ad ipsum remedium respiciendum erit, quorum mitiora et mitissima effectum omnem minorem, saepe vix conspicuum, — fortiora et fortissima validum saepe, et tumultuarium exerunt. — Topicum catharticorum effectum hic quoque primum et ante omnia nervi intestinorum experiuntur, quo stimulo ad fibras musculares, et omnem intestinorum substantiam protenso motus eorum peristalticus, et secretio augetur, quibus omnibus alvus liberior, fluidior, frequentior provocatur.

15.

Effectum topico proximum sistema ganglionum, et quam maxime inferior ejus plaga experitur. Exstimulatio hujus systematis, ejusque

*

reactio torminibus fit manifesta, quae eo sunt vehementiora, quo sensilitas nervorum major, et quo purgans fortius fuerit. Eaedem vero in nervis his, organisque, quibus prospiciunt, provocantur mutationes, quas exstimulatio nervi vagi et splanchnici emetico provocata inducit. — Ita sanguinis, et humorum omnium per vasa abdominis, haemorrhoidalia imprimis, et organorum genitalium — motus positivo modo impellitur: potentissime purgantibus principio resinoso divitibus — *Drasticis*. — Incitatio haec vasa solum abdominalia plectit ita, ut ipsis quoque remediis drasticis virtus calefaciens pro universo sisteme sanguifero, saltem eminens, iniuste satis tribui videatur.

16.

Effectu hoc tam topico, quam et consensuali, organis imprimis abdominis impresso, insignis ponitur remediorum catharticorum effectus antagonisticus — ab eo emeticorum multum discrepans. Virtus haec antagonistica, qua sistema cerebrale plectitur ea ratione modificata est, ut effectum hunc medulla spinalis, et nervi ejus validiorem experiantur; cerebrum autem ipsum, et nervi cerebrales etiam quidem, longe tamen debilius, quam ab emeticis, adficiantur.

Scopo autem eo adhibita cathartica, ut humoribus ad intestina, et reliqua organa abdomi-

nalia allicitis , sanguinem a nobilioribus partibus derivent , vigentemque hac ratione in his processum morbosum extinguant , sat saepe nulli alio remedio cedunt . Hinc in congestionibus sanguinis ad caput , thoracem etc. ; in inflammationibus organorum cavis his contentorum eo quam maxime tempore , quo haec infracta in oppositum statum , congestionem nempe passivam transire minatur optimo cum effectu frequentissime in usum trahuntur.

Incitata vero tubi alimentaris remediis purgantibus activitate , ea cutis externae antagonistice communiter deprimitur . Hinc egregius purgantium in moderanda transpiratione cutis , sudoribus profusis cohibendis virtus ; quo tamen scopo cauti remedia hacc in usum trahamus , ne irritatione tubi alimentaris graviorem nefors morbum provocemus , qui in cuti tanti discriminis non est , ni nimiopercere excedens corpori universo liquationem minetur..

Revelentia cutanea.

17.

Derivatio ad cutim externam omnium frequentissima (§. 9.) multifariis effectuatur remediis , in quibus — praecipuis et magis usitatis — enumerandis ea ratione versabimur , ut *mitiora*

primum , et talia , quae cuti universae vel majori ejus parti ; dein *fortiora* et *fortissima* minori vel minimae cutis plagae adplicanda exponamus.

Balneum simplex.

18.

Balneum simplex sive universale , sive partiale diversum in corpore exerit effectum , praeter alia momenta , quam maxime pro diverso , quo pollet , caloris gradu . — *Aqua frigida* a 0—10° , aut 15°+0 R. scopo derivante forma lotionis aut perfusionis in usum tracta a Medicis non paucis multis extollitur eucomiis. Adplicata enim , juxta eos , hac ratione cuti aqua frigida caloricum ejus subtrahitur ; ad quod restituendum sanguinis unda ad cutim mox post lotionem abstersam , et tepore lecti fotam propellitur. Amoena hoc modo saepe provocatur ephidrosis , atque exantheme segnius erumpens sollicitatur , aut ad interiora nefors tendens ad locum originis revocatur . — Sub *balneo temperato* 20—25°+0 R. nec calor , nec frigus notabilem aliquem in corpus exerit effectum , solaque hoc in casu aquae in cutim virtus respicienda venit ; quae quatenus in cutis a sudore aut pulveribus repurgatione consistit , omnem ejus functionem modo lenissimo restringendo balneum temperatum revulsiones ad organa

interiora periculosas saepe praepedit ; in diaeticis eapropter maximaem semper utilitatis. — *Balneum universale calidum* a 25°—30°+0 R. et ultra universum corpus, et systema imprimis sanguiferum positivo adscit stimulo, quo sanguinem ad cutim externam potenter quidem allicit, ast illum magis rarefactum ad omnes alias etiam corporis partes urget, gravesque hoc modo concitat turbas. Ea propter scopo revellente passim in Rheumatismo Chronico, hic tamen optimo cum effectu, adhibetur.

19.

Scopo revulsivo longe frequentius Balnea calida partialia in usum trahuntur. Universum enim systema sanguiferum minus potenter concitando, partialem potius sanguinis ad cutim congestionem provocantia cum a partibus aliis optime derivant. — Ita sub congestionibus sanguinis ad caput, pulmones, organa abdominis balneum par-tiale calidum saepe solum sufferendis his malis, restituendoque aequilibrio est. Malis his ex Amenorrhœa profluentibus semicupiuin menses saepe revocat, amissamque restituit sanitatem. Praesente graviditate balnea manuum eundem persaepe praestant effectum, quin vita foetus hoc modo in periculum conjiciatur. Adhibentur insuper balnea partialia ad revocandum florem ali-

quem cutaneum topicum , aut arthritidem retrocessam apud individua , quibus balneum universale minus conveniret . —

Frictiones.

20.

Frictiones cutis ni sine eo adhibeantur , ut remedia applicita cum vitalitate cutis exaltata in vividiorem conflictum deveniendo eo certiore et intensiorem effectum exerant , vasisque absorbentibus melius cedant — scopo derivante saepius in usum trahuntur . Stimulo enim nervis cutaneis impresso universum systema nervosum torpidum multum excitatur , et adfluxu humorum ad cutim provocato revulsio a partibus nobilioribus insignis effectuatur . Fiunt autem frictiones linteaminibus , panno etc. sine , vel additis simul remediis stimulantibus ut plurimum spiritu vini simplici , aromatico , camphorato , therebintinato etc. Frictiones adhibita vi majori , aut remediis acribus exasperatae omnem rubefacientium virutem exhibent .

Rubefacientia.

21.

Acria , ab effectu , quem provocant , **Rubefacientia** dicta , cuti externae applicata primum et

ante omnia sensum pruritus concitant, quo mox in eum ardoris, et doloris verso plaga omnis stimulo acri lacesita erythematem corripitur. Actione acris nunc limitata superficialis haec dermatitis symptomatibus inflammationis omnibus stipata serius aut ocyus cum desquamatione epidermidis disparet; quo exitu rubefacientia ab aliis mox enumerandis discrepant. — Phoenomena haec manifesto indicio sunt, acribus externe quoque adhibitis vitam sensiferam primo adfici; cuius tamen reactionibus vitae tam irritabili quam etiam vegetativae communicatis superficialis mox concitatur phlogosis, quibus omnibus topica rubefacientium virtus absolvitur,

22.

Effectus hujus topici gratia, nullo ad reactiones secundarias respectu habitu rubefacientia vix unquam in usum trahuntur. Adhibentur potius ob effectum eorum tam consensualem, quam antagonisticum in multis organis conspicuum. — Extenditur nempe irritatio topica consensus oper ad universum systema dermaticum, cuius vitalitate exaltata functio omnis simul expeditur. Ita cuti flaccidae ob infractam vitalitatem sudorem copiosum fundenti rubefacientia stimulum et tonum addunt. Ita cuti spasmo stricta, arida, frigida non est remedium rubefacientibus praestan-

tius, quod nimirum spasmum cutis expeditius solveret, functionemque ejus normalem certius revocaret. — E dermate effectus rubefacientium consensus ope ad interna quoque organa propagatur. Sic depressa vitalitate cerebri atonia sopore stupore; aut medullae spinalis paralysibus manifesta, rubefacientia stimulo periphericis nervorum sinibus addito ad ipsum centrum Systematis nervosi extenso mala haec sat saepe feliciter debellant. —

23.

Sed praeter effectum hunc consensualem insignis est rubefacientium virtus antagonistica. — Sic torpore periphericae Systematis nervosi partis sublato, gravissimae saepe partis centralis turbae, deliria, spasmi etc. componuntur. — Sic alacriori cutis metamorphosi concitata et sustentata, actio vasorum hic incitatur, et affluxus humorum copiosior provocatur, quibus omnibus organa sanguine obruta eo liberantur. — Cuti insuper externa, qua organo se et excernente cum reliquis organis vitae vegetativae in vitali necessitudine necessario existente (§. 6.) facile patet, qui fiat, ut transpiratione cutanea rubefacientibus sollicitata (§. 21.) caeterae corporis se et excretiones potenter alterentur. Cutis enim munere laeso organa secretionis interna vices

eius agere nituntur, quo abnormi conamine externa functione restituta, remediiis his liberantur.

24.

Si jam nunc nexus hunc tam consensualem, quam antagonisticum, quem sistema cutaneum externum cum diversissimis corporis partibus fovet, debite reslexerimus, eo insuper in considerationem justam tracto, functionem cutis cohibit tam morborum plurimorum matrem esse, atrium hoc in omni ferme morbo ad absolvendas crises salutares apertum desiderari, eximiam rubefacientium in morbos plurimos debellandos virtutem medicam, usumque frequentissimum dignis effremus encomiis. Indicationes speciales ex iis, quae dicta sunt, facile eruuntur.

25.

Remedia tantae virtutis adversis sub circumstantiis in usum tracta nociva reddi suapte patet, quare non raro indicata licet, abesse omnino debebunt. Praecipua contraindicationis momenta ab ipsa cuti petuntur, cuius irritabilitas et sensilitas morbose exaltata, aut vita vegetativa multum depressa usum rubefacientium ex aequo vetant. Nam stimulo illorum malum jam intenditur,

jam erythematē ulcerosa, aut gangraenosa degeneratio cutis provocatur. Illoc praecipue obvenit in dyscrasia putrida, scorbuto, oedemate etc.

Vesicantia.

26.

Topica et primaria vesicantium actio ei rubefacientium est simillima. Erythema et hic provocatur, quod vesicantibus adhibitis satis dilutis, aut actione eorum interrupta desquamatione epidermidis pariter finem capit (§. 21.) Ast actione acris continuata superficialis haec phlogosis intenditur, ut non amplius crisi normali solvi possit, utque transpiratio critica vaporosa in secretionem densam lymphaticam abeat, quae cum epidermidem trahere non valeat, eam in bullam aut vesicam elevat. Rupta haec vesica secretionem primo lymphaticam palam facit, quae paulo post in verum pus convertitur, ni lympha condensata epidermidem restituat.

27.

Ubi vesicantia effectum topicum ultra eum rubefacientium non intendunt, actione etiam secundaria omni his similia sunt. Cum tamen

plagae, quae vesicantibus adsignantur vix unquam ita late pateant, ut illae rubefacientium; cum nec eum ardorem et dolorem, ut rubefacientia provocent, Systema nempe nervosum tanta vi non adgrediantur; cumque non possint frequenter adeo reiterari, ut rubefacientia, quorum virtus reiteratione hac plurimum intenditur: — effectus vesicantium ad rubefactionem solum applicatorum omnis tam extpsione, quam intensitate longe minor erit, nec illud ideo in therapia emolumentum praestabunt, quod rubefacientia largiuntur. — Sed plena etiam, ut ita dicam, dosi adhibita ob momenta eadem modo dicta effectum consensualem multo inferiorem rubefacientibus exerunt.

Praecipua' vesicantium Virtus, et indicatio therapeutica a secretione nova petitur, quae materiis plasticis dives, duratione et intensitate insignis in peculiarem cum vita vegetativa universa correlationem devenit. Exhibit hac ratione cutis novum secretionis organon, cuius cum organismo omni nexus vitalis multiplex graves ponit effectus secundarios, qui primo quidem ad vegetationem ipsam referuntur, sed et postea vegetativum Systematis nervosi alterant, et mutationem functionum durabilem inducere valent.

— Ita secretio plague externae aucta suppurationes internas progredi inhibet, uti et inflammations organorum vitae vegetativae. Hoc ipsum provocatione Antitheseos polaris, atque dirivatione, transpositione ut ita dicam metastatica, fieri in aperto est. Facile tamen patet, ut similis metastatis fiat, vesicans organon adsectum ne contingat, ei quidem prope, in tali tamen absentia adplicandum (§. 8.), ut effectus solum antagonistici organon protopathicum particeps reddatur. — Ita Rheumatismi diutini rubefacientibus absque effectu tentatis vesicantibus persaepe cedunt. Prouti enim crisis materialis cutis vesicantibus provocatur, iisdem materialis crisis affectionum internarum localium sistitur, et haec secretio nova internarum vices agit.

Sed si ab hoc effectu vesicantium secundario rescindamus etiam, quo tam cutis quam organa interna a productis morbosis ob abnormem mixtionem normali atrio non eliminandis liberatur — secretio cutis aucta resorptionem organorum internorum auctam inducit. Processus hic resorptionis alacrioris vividissimus in organis plague vesicantibus concitatae vicinis excitatur, sed et in profundum protenditur, quamvis intensitate decrescat; quo modo producta morbosa inflammationis cum primis vegetativae chronicæ lymphatica, aut lymphatico — puriformia discutiuntur.

**Cum vesicantium effectus exsiccatione solum
plagae excoriatae finem sortiatur, et cum secre-
tio lymphatica praecipuam eorum a rubefacien-
tibus diversitatem sistat in morbis ut plurimum
vegetationis chronicis in usum trahuntur. —
Plurimum autem proficia erunt:**

a) Ubi secretio cutanea sive normalis, sive
abnormis, sed habitualis redditia suppressa mix-
tionem et functionem partis internae morbose
alterat.

b) Ubi labes organi interni auctam secre-
tionem superficialem, ut crisim materialem poscit.

c) Ubi resorptio in organismi penetralibus
sollicitanda est fine eo, ut stases et congestio-
nes solvantur.

d) Ubi nervorum activitas incitanda, aut
potius ea suppressa vinculis suis liberanda est.
— Quantum ad mitigandas organorum interno-
rum inflammations chronicas, cohibendas eorum
suppurationes valeant, supra jam meminimus.

Exulcerantia.

Medium inter caustica et vesicantia locum
tenent Exulcerantia sic dicta ab effectu, quem

cuti externae adplicita exerunt. Producunt enim in ea validam inflammationem, quae in suppurationem specificam versa profundam cutis exulcerationem suscitat. Effectu ergo topico multum intenso, et eo insuper a praecedentibus differunt, quod effectum omnem tardiorem quidem sed durabiliorem in profundum magis, quam latum nitentem excitent. Potentissima idcirco pro vita imprimis vegetativa sistunt remedia, quibus valida, et perstans provocatur revulsio, qua qualitate rubefacientia aequa ac vescantia antecellunt, et ob quam frequentissime, et ferme unice in usum trahuntur medicum. Usitatum hoc scopo *Unquentum stibiatum* est, ita tamen, ut nisi cutis sensilior, tenera dolores fortiores, et alia mala nos extimescere faciat; phtysis autem cum primis pulmonalis, arthritis retrograda, aut alia quaecunque mala revellentia fortissima exposcant *Cortex quoque Mezerei* aut recens aut siccus aceto prius emollitus; vel *unquentum Euphorpii* sat saepe adhibeantur; — e chirurgicis vero *setaceum*.

31.

In morbis itaque omnibus, in quibus repellentia mitiora provocando effectui optato non sunt, ubi simul periphericis nervorum finibus fortem stimulum addere, atque revulsionem va-

Iidam facere necesse est, Exulcerantia omnino indicata erunt. — Sic in labe Rheumatica, et Arthritica diuturna, quae nullis aliis revellentibus cedunt; in Tussi convulsiva, Nevrosibus chronicis: Mania, Epilepsia, Spasmis optimo saepe cum fructu adhibentur. — Ita in Catarrho chronicō, Phtysi pulmonali egregia sistunt remedia. In Febri Intermittente novissimis temporibus Cel. Pommer unquam Autenriethi bono cum effectu adhibuit et licet hīc actionem ejus omnibus perspectam non habeamus, haec tamen alia, ac derivans esse vix poterit.

Cauteria.

Cauteria potentialia, vulgo *Caustica*, materiae organicae cui adlicantur, cohaesionēm protinus tollunt, et ipsam texturam organicam destruendo vitam omnēm in loco applicationis immediato sufferunt, nisi multum diluta in usum trahantur, quo in casu rubefacientium more agunt. Inflammatio et exulceratio eis inducta vehemens est, qua virtute medium quodammodo inter exulcerantia, et ferrum candens locum tenent. Adhibentur solum ad localem mali topici sanationem, licet in aliis quoque morbis, scopo nempe derivante universalis, optimo cum fructu adhiberi possent.

Cauterium vivum, s. ferrum candens combustionē partis organicae, cui adplicatur mortem partialeū inducit. Provocatur autem hac ratione in plaga vicina valida omnis processus vitalis reactio dolore immani, humorum adfluxu, et inflammatione vehementi in largissimam suppurationem versa manifesta. Vita omni ita incitata nervorum torpor, et paralyses tolluntur, nevralgiae et inflammations pertinacissimae derivantur, humorum resorbtio multum intenditur. Adhibetur ferrum candens tunc tantum, ubi mitiora nihil prosunt, ad morbos atroces ad cutim utplurimum derivandos. Ita in nevralgiis et spasmis; si perstans nervorum concitatio, et nevralgiae deductio intenditur. — Ita in Coxalgia, inflammatione columnae vertebralis ferrum candens remedium sistit saepissime unicum. — Ita ad sistendas suppurationes internas cauterium ulceribus artificialibus quandoque etiam praeponendum est, si nimirum vehemens et perstans nervorum alteratio simul desideratur.



THESES DEFENDENDAE.

1.

Non aetas , sed cognitionum claritas , medicum facit.

2.

Nec Medicus Chirurgia , nec Chirurgus medicina carere possunt.

3.

Mater proli propriae ubera denegans suae et infantis saluti utplurimum male consultit.

4.

Frequentia operationum in obstetricia cum progrediente artis perfectione est in ratione inversa.

5.

Acetas plumbi acidulus solutus Pharm. Austr. non est Acetum Lithargyri.

6.

Substratum Febris intermittentis systema gangliosum est.

7.

Non est syphilis ex Blenorhoea.

8.

Cholera non sistit morbum contagiosum.

9.

**Herniae incarceratae remedium optimum est
operatio Chirurgica.**

10.

**Exstirratio uteri e numero operationum Chi-
rurgicarum excludenda:**

